



STATUT

ISLAMSKE ZAJEDNICE BOŠNJAKA SJEVERNE AMERIKE

NAZIV ORGANIZACIJE

Član 1.

Islamska zajednica Bošnjaka je krovna vjerska zajednica svih bošnjačkih džemata na području Sjeverne Amerike koji su njeni punopravni članovi.

Naziv organizacije je "Islamska Zajednica Bošnjaka Sjeverne Amerike".

U daljem tekstu Statuta koristiće se skraćeno ime IZBSA.

Službeni naziv zajednice na engleskom jeziku je: "Islamic Community of North American Bosniaks", skraćeno "ICNAB".

Član 2.

IZBSA je dio Islamske zajednice u Bosni i Hercegovini (IZ u BiH), koja je osnovana sa ciljem ispunjavanja svih duhovnih i vjerskih potreba i obaveza Bošnjaka u Sjevernoj Americi.

CILJEVI I DJELATNOSTI

Član 3.

Primarni cilj IZBSA je obezbjeđivanje uslova za praktikovanje islama prema učenju hanefijske pravne škole u fikhu / praksi, maturidijskog tumačenja u akaidu / vjerovanju, što je u skladu sa islamskom tradicijom Bošnjaka.

Član 4.

Izvor islamskih propisa i zakona je Kur'an (sveta knjiga islamske vjere) i sunnet (praksa) Poslanika Muhammeda alejhisselam, po tumačenju učenjaka Ehli Sunneta vel Džema'ata.

Član 5.



IZBSA čuva vjerodostojnost islamskih normi i osigurava njihovo tumačenje i primjenu.

Član 6.

IZBSA se brine o islamskom odgoju i obrazovanju svojih pripadnika i zalaže se za očuvanje vrijednosti braka i porodičnog života.

Član 7.

IZBSA organizuje i pomaže aktivnosti kojima se poboljšavaju društveni i materijalni uvjeti života muslimana.

IZBSA organizuje djelatnosti kojima se stiče, štiti i uvećava njena imovina.

Član 8.

IZBSA uspostavlja i održava saradnju sa drugim islamskim zajednicama, ustanovama i organizacijama u svijetu.

IZBSA sarađuje sa drugim vjerskim zajednicama i organizacijama u aktivnostima kojima se doprinosi miru, pravdi i dobru među ljudima.

Član 9.

IZBSA je poučavanje muslimanskog i nemuslimanskog društva o tolerantnim i miroljubivim islamskim shvatanjima.

IZBSA će održavati otvoreni dijalog sa ostalim vjerskih organizacijama promovišući sveobuhvatan mir i ljudska prava s ciljem pozitivne integracije u šire društvo kroz održavanje otvorenog dijaloga sa drugim vjerskim i kulturnim zajednicama, bez obzira na rasu, vjeru, boju kože i bez diskriminacije bazirane na uvjerenjima kao i proklamovanje univerzalnosti i sveobuhvatnosti vjere i duhovnosti.

Član 10.

Promoviranje ekstremnih vjerskih načela biće odbačeno, a bilo koji dužnosnik IZBSA



izabran ili imenovan, koji zastupa mišljenje okarakterisano radikalnim ili kontraverznim, bit će adekvatno procesuiran od strane nadležnog organa Islamske IZBSA u skladu sa normativnim aktima.

Član 11.

Sve vjerske obrede u džematima članicama IZBSA predvode isključivo ovlaštena vjerska lica.

Član 12.

U svrhu sprečavanja mijenjanja ciljeva IZBSA definiranih ovim Statutom ili bilo čega što se smatra kršenjem istih biće poništeni i dokinuti od strane nadležnih organa Bošnjaka IZBSA.

IZBSA će kontinuirano vršiti humanitarne aktivnosti u USA, Kanadi i mjestima gdje se ukaže potreba za humanitarnom pomoći.

IZBSA će uspostaviti potrebnu infrastrukturu kako bi bila u mogućnosti pomoći svima, a posebno siročadima, udovicama, bolesnim i hendikepiranim.

VRSTA ORGANIZACIJE

Član 13.

IZBSA je formirana na osnovama Zakona o neprofitnim organizacijama države Arizona, SAD kako bi ostvarila ciljeve, objašnjene u članovima 4 - 10 ovog Statuta.

KANCELARIJE I UREDI

Član 14.

Sjedište IZBSA je na adresi: 13246 North 23rd Avenue, Phoenix, AZ 85029.

Odluku o promjeni sjedišta donosi Skupština na prijedlog Izvršnog odbora.



Član 15.

IZBSA može u svako vrijeme da otvori podružnice i podružne kancelarije na bilo kojem mjestu ili mjestima gdje ovo tijelo djeluje u skladu sa svojim normativnim aktima.

USTROJSTVO ISLAMSKJE ZAJEDNICE BOŠNJAKA SJEVERNE AMERIKE

DŽEMAT

Član 16.

Džemat je osnovna organizaciona jedinica IZBSA.

Džemat u pravilu sačinjava skupina ljudi koji žive na jednom području i koji su međusobno povezani u izvršavanju zajedničkih islamskih dužnosti.

Džemat treba imati najmanje 200 muslimanskih domaćinstava ili manje, ako je u stanju finansijski održavati sam sebe.

Član 17.

Članstvo džemata unutar IZBSA se definiše pravilnikom o prijemu džemata u IZBSA.

Član 18.

Organi džemata su skupština džemata i džematski odbor.

Član 19.

Skupštinu džemata sačinjavaju svi članovi koji izvršavaju svoje obaveze u dotičnom džematu.

Skupština džemata bira džematski odbor, članove skupštine medžlisa, zastupnike IZBSA, te donosi važnije odluke koje se tiču organizacije džemata i vjerskog života u džematu.



Član 20.

Džematski odbor osigurava uvjete za vjerski život u džematu.

Član 21.

Predsjednik džematskog odbora predstavlja džemat u administrativnim i imovinskim poslovima.

Član 22.

Imam je član džematskog odbora po položaju.

Imam se brine o vjerskom životu u džematu, vodi matične knjige džemata i predstavlja džemat u stvarima vjere.

Imam ima pravo veta na svaku odluku koja je u suprotnosti sa islamskim propisima.

Imama postavlja, premješta i razrješava reisu-l-ulema na prijedlog muftije i glavnog imama IZBSA.

Član 23.

Džemati svoj rad usklađuju sa Pravilnikom o radu džemata IZBSA.

MEDŽLIS

Član 24.

Medžlis je viša organizaciona jedinica IZBSA, koja obuhvata džemate, koji čine povezanu cjelinu jedne regije.

Član 25.

Odluku o osnivanju medžlisa ili reorganizaciji medžlisa donosi Skupština IZBSA na



prijedlog Izvršnog odbora.

Član 26.

Organi medžlisa su skupština medžlisa, glavni imam medžlisa i nadzorni odbor medžlisa.

Skupštinu medžlisa čine: glavni imam medžlisa, svi imami na području medžlisa i ostali članovi shodno pravilniku o izborima i mandatima u IZBSA.

Skupština medžlisa:

- bira i kandiduje članove Izvršnog odbora IZBSA.
- bira i kandiduje članove nadzornog odbora medžlisa
- usvaja godišnji izvještaj o radu medžlisa

Glavni imam medžlisa je član skupštine medžlisa po funkciji i predsjedava radom iste.

Glavni imam medžlisa se brine o vjerskom životu na području medžlisa i odgovoran je za rad imama, hatiba i muallima na području medžlisa.

Glavnog imama medžlisa postavlja, premješta i razrješava reisu-l-ulema na prijedlog glavnog imama IZBSA.

Nadzorni odbor medžlisa koordinira i nadzire rad džematskih odbora i daje im uputstva za rad.

Član 27.

Rad medžlisa se definiše Pravilnikom o radu medžlisa IZBSA.

IZVRŠNI ODBOR ISLAMSKE ZAJEDNICE BOŠNJAKA SJEVERNE AMERIKE

Član 28.

Izvršni odbor je najviši vjerski i administrativni organ IZBSA.



Član 29.

Izvršni odbor IZBSA se sastoji od 9 članova: glavni imam IZBSA, glavni imami medžlisa ispred svakog od četiri medžlisa i po jedan član iz reda džematlija ispred svakog medžlisa, te još jedan ili više članova iz reda džematlija s kojom bi se zadovoljila zastupljenost imama i džematlija shodno članu 14. stav 4. Pravilnika o organiziranju Islamske zajednice u dijaspori.

Način i proces izbora jedog ili više članova iz reda džematlija će definisati komisija izabrana na skupštini IZBSA u Denver, CO održanoj 31. marta do 1. aprila 2018. godine, i prijedlog će zajedno sa ostalim amandmanima na sve pravilnike IZBSA predstaviti na usvajanje Skupštini koja će se održati u 2019. godini.

Član 30.

Izvršni odbor formira sljedeće komisije i tijela:

1. savjet imama,
2. komisija za fihkska pitanja,
3. Ured za zekat rukovodi prikupljanjem i distribucijom zekata,
4. Ured za hadždž i umru,
5. Vjersko-prosvjetna služba,
6. Ured za izdavačku djelatnost,
7. ostale stalne i privremene komisije ili druga tijela koja mogu biti potrebna.

Nadležnosti svih komisija i tijela iz ovog člana bit će regulisane posebnim aktom kojeg donosi Izvršni odbor.

Član 31.

Način izbora i dužina mandata članova Izvršnog odbora se definišu Pravilnikom o izborima i mandatima IZBSA i Pravilnikom o organiziranju Islamske zajednice u dijaspori.

Član 32.

Rad Izvršnog odbora IZBSA se definiše Pravilnikom o radu Izvršnog odbora IZBSA. Nadležnosti Izvršnog odbora su definisane Pravilnikom o organiziranju Islamske zajednice u dijaspori.



SKUPŠTINA ISLAMSKJE ZAJEDNICE BOŠNJAKA SJEVERNE AMERIKE

Član 33.

Skupština je najviši predstavnički i zakonodavni organ IZBSA.

Član 34.

Skupština IZBSA:

- usvaja Statut i druge propise kojima se uređuje organizacija i djelovanje organa i ustanova IZBSA,
- usvaja propise o upotrebi logo-a i obilježja IZBSA,
- daje smjernice za rad organa i ustanova i za upravljanje imovinom IZBSA,
- odobrava budžet i usvaja finansijski izvještaj Izvršnog IZBSA,
- osniva ustanove i fondove i odobrava osnivanje preduzeća pri IZBSA,
- verifikuje i vrši izbor članova Izvršnog odbora IZBSA,
- imenuje i razrješava članove Suda časti IZBSA.

Dodatne nadležnosti su definisane Pravilnikom o organiziranju Islamske zajednice u dijaspori.

Član 35.

Skupština IZBSA ima predsjednika, potpredsjednika i sekretara.

Predsjednika, potpredsjednika i sekretara Skupštine IZBSA biraju zastupnici Skupštine. Mandat predsjednika je definisan Pravilnikom o organiziranju Islamske zajednice u dijaspori.

Predsjednik Skupštine predsjedava sjednicom Skupštine i saziva istu.

Predsjednik Skupštine je dužan sazvati sjednicu Skupštine IZBSA ako to od njega zatraži najmanje jedna četvrtina zastupnika, Izvršni odbor IZBSA ili glavni imam IZBSA.

Član 36.

Zastupnici su delegati džemata koji su prošli potrebnu proceduru prijema u IZBSA.



Džemati delegiraju zastupnike na osnovu pravilnika o izborima i mandatima IZBSA.

Član 37.

Godišnja skupština Skupštine se održava svake godine u određeno vrijeme i na određenom mjestu.

Kvorum skupštine Skupštine čini nadpolovična većina od ukupnog broja zastupnika.

Član 38.

Prijedlog dnevnog reda Skupštine, redovne i vanredne, utvrđuje predsjednik Skupštine uz konsultacije sa Izvršnim odborom IZBSA.

Dnevni red se usvaja na početku svake Skupštine od strane prisutnih zastupnika nadpolovičnom većinom.

Član 39.

Poziv za sjednicu Skupštine mora biti dostavljen zastupnicima najmanje 30 dana prije sazivanja sjednice Skupštine IZBSA.

Poziv treba sadržavati: prijedlog dnevnog reda sa materijalima, mjesto, datum i vrijeme održavanja sjednice.

Na vanrednim sjednicama će se raspravljati samo ono što je navedeno kao svrha saziva sjednice.

Član 40.

Skupština IZBSA može formirati stalne i privremene komisije.

Skupština IZBSA formira sljedeće komisije i tijela:

1. vakufski ured
2. Sud časti
3. izborna komisija
4. ostale stalne i privremene komisije ili druga tijela koja mogu biti potrebna.



Nadležnosti svih komisija i tijela iz ovog člana bit će regulisane posebnim aktom kojeg donosi Skupština IZBSA.

Član 41.

Zastupnik može podnijeti ostavku na funkciju u bilo kojem trenutku.

Ostavka ne oslobađa zastupnike u ostavci bilo koje obaveze, nastalih troškova, usluga ili trenutnih koristi, dugovanja, procjena ili naknada ili onoga što proizilazi iz ugovora ili drugih načina i ne smije uskratiti pravo IZBSA da sprovede bilo koju obavezu ili dobije odštetu za kršenje iste.

SLUŽBENICI IZBSA

Član 42.

Službenici IZBSA su: muftija i glavni imam IZBSA, sekretar / blagajnik, glavni imami medžlisa i imami.

MUFTIJA I GLAVNI IMAM IZBSA

Član 43.

Muftija, sa sjedištem u Sjedinjenim Američkim Državama, za područje muftiluka na kojem djeluje IZBSA, po funkciji, obavlja dužnost glavnog imama IZBSA. Nadležnosti muftije su definisane. Pravilnikom o organiziranju Islamske zajednice u dijaspori.

Glavni imam IZBSA je predsjednik IZBSA i predstavlja IZBSA u administrativnim i stvarima vjere.

Glavni imam IZBSA saziva i predsjedava sjednicama Izvršnog odbora.

Glavni imam IZBSA izvršava ovlasti i obavlja dužnosti koje su propisane Statutom i Pravilnikom o radu Izvršnog IZBSA.

Glavni imam IZBSA:

- tumači islamske norme,
- stara se o zaštiti vjerskih prava muslimana,



- nadzire rad glavnih imama medžlisa i imama,
- predlaže postavljenje, razrješenje, premještanje imama i glavnih imama medžlisa.

Član 44.

Izvršni odbor može imenovati i može odobriti glavnom imamu IZBSA da imenuje bilo koju drugu stranku za čijom djelatnošću IZBSA ima potrebu, koja može imati titulu, kancelariju za određeno vrijeme, ovlasti, izvršavati obaveze specificirane Statutom ili određenih s vremena na vrijeme od strane Izvršnog odbora.

SEKRETAR

Član 45.

Sekretar obavlja sve administrativne poslove IZBSA.

Sekretar prisustvuje sjednicama Izvršnog odbora i vodi knjigu zapisnika svih sjednica Izvršnog odbora i komisija, sa datumom i mjestom održavanja i imenima prisutnih na sjednicama Izvršnog odbora i komisija.

Sekretar je dužan da uredno vodi kancelarijsko i arhivsko poslovanje IZBSA.

Sekretar je dužan da dostavi zapisnike predviđenom procedurom, čuva pečat IZBSA na bezbjednom mjestu i ima druge ovlasti i obaveze propisane od strane Izvršnog odbora.

BLAGAJNIK

Član 46.

Blagajnik je dužan da evidentira sve finansijske transakcije IZBSA.

Blagajnik je dužan da uredno vodi finansijske knjige u skladu sa zakonskom regulativom i da ih na uvid procedurom predviđenom Pravilnikom o radu Izvršnog odbora IZBSA.

Blagajnik ima potrebna ovlaštenja za obavljanje dužnosti koje su u prirodi njegove službe.

Sva prikupljena finansijska sredstva trebaju biti u najkraćem roku položena na račun IZBSA u bankama koje je izabrao Izvršni odbor.



Dužnosti blagajnika i sekretara mogu biti objedinjene.

U odsustvu ili spriječenosti sekretara ili blagajnika pomoćnici sekretara i blagajnika, ako su prethodno imenovani, imaju ovlaštenja da obnašaju dužnosti odsutnih.

GLAVNI IMAMI MEDŽLISA

Član 47.

Glavni imami medžlisa vrše svoje dužnosti i funkcije u skladu sa nadležnostima iz člana 27. ovog Statuta.

IMAMI

Član 48.

Imami vrše svoje dužnosti i funkcije u skladu sa nadležnostima iz člana 22. ovog Statuta i Pravilnika o radu imama.

FINANSIJSKA NAKNADA

Član 49.

IZBSA može nadoknaditi troškove članovima, službenicima i strankama na osnovu vlastitog propisa o finansijskom poslovanju.

Član 50.

IZBSA neće nadoknaditi troškove prouzrokovane od strane bilo kojeg člana, osim ako takvi troškovi budu napravljeni po ovlaštenju odgovarajućeg organa IZBSA.

Suspendiranim članovima IZBSA i njihovim zastupnicima IZBSA ne snosi troškove.

IMOVINA ISLAMSKJE ZAJEDNICE BOŠNJAKA SJEVERNE AMERIKE



Član 51.

Imovinu IZBSA čine vakufska dobra i druge stvari, prava i novčana sredstva.

Član 52.

Imovina služi IZBSA za djelatnosti kojima se postiže cilj IZBSA i ne može se koristiti za druge svrhe.

Član 53.

Imovina IZBSA stiže se iz:

- vakufskih dobara i druge pokretne i nepokretne imovine IZBSA,
- redovnih doprinosa,
- zekata, sadakatu-l-fitra i kurbana,
- prihoda organizacija i ustanova Islamske zajednice koje ostvaruju dobit,
- fondova,
- poklona, vasijjeta i drugih prihoda i priloga.

Član 54.

Svako fizičko i pravno lice može u duhu šerijatskih propisa osnovati vakuf.

Vakufska dobra su po svojoj naravi neotuđiva.

Rijaset Islamske zajednice Bošnjaka odobrava osnivanje vakufa za vjerske namjene i donosi odluke o zamjeni vakufske imovine na prijedlog Izvršnog Odbora IZBSA.

Član 55.

Vakufskom imovinom upravlja Vakufski ured IZBSA.

Pravila o organizaciji i radu Vakufskog ureda donosi Skupština IZBSA.

U upravljanju vakufskom imovinom obavezno se primjenjuju odredbe vakufname i vasijjeta.



VII. IZBORNI SISTEM

Član 56.

Aktivno i pasivno biračko pravo u IZBSA ima svaki pripadnik džemata koji je navršio osamnaest godina života i koji izvršava svoje obaveze u džematu.

Član 57.

Izbori u IZBSA vrše se tajnim glasanjem između više kandidata.

Komisija za izbore dužna je odbiti kandidaturu lica za koje se utvrdi da ne ispunjava uvjete za izbor u organe Islamske zajednice Bošnjaka.

Jedna osoba ne može istovremeno obavljati dužnost u najvišim predstavničkim i izvršnim organima Islamske zajednice Bošnjaka.

Član 58.

Mandati članova svih kolegijalnih organa se regulišu u Pravilniku o izborima i mandatima IZBSA.

Izabrani organi IZBSA obavljaju svoju dužnost i poslije isteka mandata, sve do izbora, odnosno, konstituiranja novih organa.

Član 59.

Nosioci dužnosti u predstavničkim i izvršnim organima Islamske zajednice imaju pravo na podnošenje ostavke.

Nosilac dužnosti u organima Islamske zajednice opoziva se ili razrješava dužnosti kada se utvrdi:

- da su njegovo ponašanje i rad u suprotnosti sa islamskim normama,
- da radi suprotno propisima i odlukama organa Islamske zajednice,
- da ne izvršava osnovne obaveze na mjestu za koje je izabran, odnosno imenovan,
- da je svoj položaj zloupotrijebio,
- da je nesposoban da obavlja svoju dužnost.



OSTALE ODREDBE

Član 60.

Svi predmeti izvršeni u ime IZBSA, uključujući, ali ne i ograničeno na ugovore, sporazume, narudžbe, zabilješke, uknjiženja, uknjiženja zadužbina, hipoteke, zakupe, sigurnosne sporazume, čekove i izdate naloge, ovjere čekova i zaprimljenih naloga, certifikata, aplikacija i izvještaja, trebaju biti izvršeni od strane službenika, stranke ili predstavnika Islamske zajednice Bošnjaka koji su ovlašteni od strane Izvršnog odbora.

Ovlaštenje može biti generalno ili ograničeno na određene slučajeve.

Član 61.

Ukoliko kontekst drugačije ne zahtijeva opće odredbe, tumačenja i definicije sadržane u općim odredbama Zakona o neprofitnim organizacijama države Arizona i Zakona o obostranim neprofitnim koristima organizacija države Arizona trebaju određivati tumačenja ovog Statuta.

Član 62.

Kraj fiskalne godine IZBSA bit će 31. decembar tekuće godine.

ARHIVA I IZVJEŠTAJI

Član 63.

IZBSA čuva arhivu i knjigovodstvo i arhivu računa, zapisnike u pisanoj formi svih upravnih postupaka članova skupštine, Izvršnog odbora, komisija i spiskove svojih članova sa njihovim imenima i adresama.

Svi dokumenti se čuvaju u glavnom uredu IZBSA.

AMANDMANI

Član 64.



Na ovaj Statut može biti donesen amandman na bilo kojoj redovnoj ili vanrednoj sjednici skupštine, a prijedlog amandmana mora biti poslan svim članovima skupštine trideset (30) dana prije održavanja sjednice.

DODATNE ODREDBE

Član 65.

Ovaj Statut je sačinjen u originalu na bosanskom jeziku i originalu na engleskom jeziku.

DISOLUCIJA

Član 66.

U slučaju disolucije IZBSA, sva imovina će pripasti Rijasetu Islamske zajednice u Bosni i Hercegovini.

PRAVOSNAŽNOST, IZMJENE I DOPUNE

Član 67.

Ovaj Pravilnik stupa na snagu danom donošenja. Amandmani na ovaj pravilnik mogu se donositi samo na Skupštini IZBSA.

U Denver, Colorado

1. april 2018. g. / 15. redžeb 1439. h. g.



Dr. Hazim ef. Fazlić
Predsjednik Skupštine
Islamske Zajednice Bošnjaka Sjeverne Amerike